

**Joibe prin dal an**  
S. Clâr

**Domenie 4**  
S. Angjeline di Foligno

**Miercus 7**  
S. Raimont

**Il proverbi**  
Pifanie, il frêt si invie



**Il soreli**  
Il prin dal an al jeve aes 7.47  
e al va a mont aes 16.33

**Vinars 2**  
S. Basili

**Lunis 5**  
S. Amelie

**Il timp**  
Neveadis bondantis  
e fuarts glaçadis

**Lis voris dal mès**  
Netait i ramaçs secs dai pomârs.  
Gjavait vie ce che al è restât  
des plantis vecjis



**La lune**  
Ai 5 lune plene

**Sabide 3**  
Ss. Non di Jesù

**Martars 6**  
Pasche Tafari

## lis GNOVIS

### RIVISTE

#### «Segnâi di lûs» dal cine furlan



Presentade ai 18 di Dicembar stât te serade di premiazion dal Concors par tescj cinematografics in lenghe furlane, inmaneât dal Centri espresions cinematografichis di Udin, la riviste dute par furlan «Segnâi di lûs», rivade al numar 13 (te foto, la *cuvier-tine*) e rapresente aromai un pont di riferiment pai cultôrs dal cine internazional in lenghe minoritarie e no

dome. Cun di fat, dongje di articui e di intervistis li che si fevele dal documentari catalan «Món petit», dal prin film di finzion in lenghe bretone, «Lann Vraz», une interviste al regist ocitan Fredo Valla a proposit dal so documentari «La Barma» e un articul sul film sart «Capo e Croce», si puedin lei un toc dedicât a di un mestri dal cine francès tant che René Allio e un su Carlo Lizzani. Plui dongje de nestre realtât, Carlo Gabsceck nus fâs riscuverzi une stele dal cine di divgnince gurizane, Nora Gregor e al scrutine «Vinodentro», l'ultin straordenari film dal regist furlan Ferdinando Vicentini Orgnani. Simpri atent a ce che al è daûr a sucedi a nivel european intal mont dal cine in chês altris lenghis, «Segnâi di lûs» al publiche achì un contribût sul festival Mostra de Cinema Occitan dal catalan Joanjo Ardanuy (un dai responsabii de manifestazion che e je cumò in partenariât cu la Mostre dal Cine), intant che intes rubricis si puedin cjatâ informazions su altris events dal gjenar tant che l'Hendaia Film Festival intal País Basc francès, il Babel Film Festival di Cagliari/Casteddu e il Celtic Media Festival, juste par citâ cualchidune. Un larc spazi al ven dât al ultin progjet de regjiste francese Christiane Rorato pe realizazion di un documentari di creazion su doi personaçs furlans cjapâts inte dramatiche aventure de costruzion de Transiberiane e, dongje, une analisi su lis tindincis li che si môf il mont dal audiovisiv furlan di chescj ultins cinc agns. Come che al è te tradizion de riviste, il numar 13 al ten dentri trê lavôrs premiâts al Concors par tescj cinematografic dal 2014. Chei altris, par resons di spazi, a saran publicâts intal numar seguitif. La riviste e da ançe un grum di informazions su lis novitâts produtivis e su lis manifestazions che si davuelzin in region, e la segnalazion dai ultins dvd che a son vignûts fûr sul marcjât. Publicade cul contribût de Agenzie regionâl pe lenghe furlane, dal Comun di Udin e de Provincie di Udin e cu la sponsorizazion de Bancje di Udin, la riviste e ven mandade in dutis lis bibliotechis dal Friûl. Si pues cjatâ li dal Visionario e li de sede dal Cec di Udin.

### CORS DI FURLAN/1

#### Dai 12 di Zenâr a Codroip

L'assessorât ae Culture dal Comun di Codroip adun cu la Societât filologjiche furlane e cu la poie de Agenzie regionâl pe lenghe furlane al inmanee un cors pratic di lenghe e culture furlane. Al sarà tignût di Gotart Mitri li de Biblioteche civiche «Pressacco», tacant dai 12 di Zenâr cun appuntamenti una volte par setemane ogni lunis des 8 e mieze fin 10 e mieze di sere par un totâl di 13 incuintris. Tal cors si studiarà la gramatiche e la grafie de lenghe furlane cence dismenteâsi di aspirts storicis, culturâi, di literature e di tradizions populârs. Lis lezioni a son a gratis e vertis a ducj cence limits di etât. No si domandin titui di studi o cognossincis particolârs de lenghe. Par segnâi o domandâ informazions si pues lâ li dal Sportel di lenghe furlane viert al prin plan de biblioteche di lunis a miercus des 3 fin 7 dopodimisdi o telefonant al 0432/908198.

### CORS DI FURLAN/2

#### Dai 21 di Zenâr a Tumieç

Rivât ae sô decime edizion, al torne a tacâ il cors pratic di lenghe e culture furlane inmaneât de Societât filologjiche furlane cu la poie de Agenzie regionâl pe lenghe furlane e la adesione dai comuns de Conçe tumiezine. Chest an il cors al scomençarà ai 21 di Zenâr e al larà indenant fin al mès di Avrîl, al varà une durade di 26 oris in dut e al sarà a gratis. Si davuelzarà ogni miercus des 8 aes 10 di sere li de sale multimedial di Palaç Frisacco a Tumieç. Il cors al è indreçât a ducj chei che a vuelin aprofondi lis lôr cognossincis su la lenghe, la storie, la gjeografie regionâl, lis tradizions populârs, lis usancis de nestre tiere. E je providiude cualchi lezion vierte a cui che nol è iscrit. Lis iscrizions a son viertis fin ai 16 di Zenâr. Il modul si pues cjatâlu li dai sportel dal citadin dai Comuns di Damâr, Cjavaç, Tumieç e Verzegnis, li dal Sportel pe lenghe furlane cun sede li dal municipi di Tumieç e tai sîts internet dai Comuns nomenâts culi sore. Par informazions si pues clamâ il numar 0433/487460.

## IL PREMI LETERARI IN LENGHE FURLANE «GLEMONE ÎR, VUEI E DOMAN» AL À FAT DISEVOT AGNS. UN BELANÇ DE ESPERIENCE



# Laboratori di sperimentazion

lacovissi: «Il nestri al è un concurs pai fruts di scuele. In disevot agns o viodin – sperin ançe in gracie dal concurs – une gnove atenzion, une gnove passion e une cussience plui vivarose dal furlan»

**D**ISEVOT CARNEVÂI su lis spalîs. Disevot agns dedicâts ai fruts di scuele, par judâju a cognossi e cjapâ cussience de lenghe furlane, e a definî percors pedagogjics scolastics par furlan, grazie a tancj scritôrs, a tancis mestris e, juste apont, a tancj fruts che a àn lavorât cun passion e braure. Il premi leterari in lenghe furlane «Glemone îr, vuei e doman» – l'unic cun trê sezions pensadis dome par fruts e frutis di scuele – si conferme «laboratori di sperimentazion, massime te didatiche dal insegnament dal furlan», al dîs il president de jurie, **Roberto lacovissi**, scritôr, gjornalist e studiôs de furlanetât, che al pant la speranza che di concurs pai plui piçui «a 'ndi vegnin fûr ancjemò altris, e ta chest câs, par dibant e sore nuie, o sin pronts, se no a fâ di pont di riferiment, almancul a regalâ cualchi fruçon de esperience aromai dispatussade».

Impuartantone la partecipazion ae edizion stade che e à puartât ae jurie dal premi il plui grant numar di lavôrs mai presentâts: ben 27, di chescj 11 contis pai fruts, 7 lavôrs di didatiche e 9 lavôrs di grup cui fruts di scuele. Te prime sezion (lis premiazions si son davuelteis, come simpri, ai 8 di Dicembar, tal palaç dal municipi di Glemone, *te foto parsore, a man campe, la sale conseâr plene*) e à vinçût Francesca Gregoricchio, secont Raffaele Serafini e tierç Mario Linussio. Te seconde sezion, prin premi a Sandra Zampieri (*te foto piçule*), secont ancjemò a Raffaele Serafini, tierç ai fruts des classis

terce, cuarte e cuinte de scuele primarie di Çurçuvint-Trep e a chei de primarie di Tamau/Cleulis. I fruts de classe 2B (an scolastic 2013/14) de scuele primarie di Plovie a son stâts i plui brâfs te tierce sezion, daûr di lôr chei de scuelute di Montenars e i frutins di chê di Rivolt (*te foto parsore a man drete*).

O vin fat un belanç de esperience cul president de jurie. «Disevot carnevâi no passin par dibant – nus dîs lacovissi –. Al bastarès chest par dî che si è tratât di une bielissime esperience. Un belanç, alore? Positif, di sigûr: tancj lavôrs, tancis bielîs relazions, tante passion e une scuvierte: la lenghe furlane e vif ancjemò!».

**President, cemût isal cambiât il premi tai agns?**

«O vin cirût di fâ in mût che il concurs al fos une sorte di laboratori di sperimentazion, massime te didatiche dal insegnament dal furlan tes scuellis, ma simpri mantignint ferme la strutture in trê sezions, che di an in an o vin gambiade dome la prime: un an pe poesie, un an pe conte, un an pal teatri, ma simpri e dome pai fruts».

**In disevot agns, di ce che si viôt des voris in concurs, ce isal cambiât tai confronts dal furlan?**

«Il nestri al è un concurs pai fruts di scuele, e dunçe il nestri voli al cjale limitât intun ort cludût. Ma chest voli al viôt che – sperin ançe in gracie dal concurs – une gnove atenzion, un gnûf interès, une gnove passion e, par fortune, une cussience plui vivarose».

**Fameis e mestris a àn une part fonda-**

**mentâl par dâ un avignû ae lenghe furlane. Ce conseis si puedino dâur?**

«Juste. Fameis e mestris a son la clâf di volte. Conseis: aes mestris di continuâ a lavorâ e sperimentâ cui fruts; aes fameis di fâ de lenghe furlane no dome la marilenghe, ma ançe la parilenghe, la barbelenghe, la agnelenghe, la nonolenghe e la lenghe dai fruts di cjase e dintors».

**Te ultime edizion e je stade une grande partecipazion di voris al concurs. Cuâl isal stât il nivel cualitatif? Cuâi i temis tratâts?**

«Robononis dal Friûl, chest an, par numar e cualitât dai lavôrs. Po stâi che chestes sbisie partecipative e divegni ançe di crisi, che e reclame lis robis che a contin di plui. Bisugne dî che i partecipants a son stâts scuasit un esercit: piçul, ma combatif, cun scritôrs, mestris e fruts che a àn presentât lavôrs fats cemût che Diu al comande, ben sestâts, cun proprietât di lenghe, cun contignûts di valôr (storie, gjeografie, ambient, relazions...) e cun braure tal doprâ i mieçs informatics».

**Cemût vegnino doprâts i lavôrs che a partecipin al concurs?**

«O vin proferit ae Societât filologjiche furlane e ae Agenzie regionâl pe lenghe furlane di fâ in mût di no dispierdiju. O savin che chestis dôs istituzions a stan metint dongje un strument, un contignidôr, une cjosule, in sumis, che e meti adun, che e fasi un inventari, di mût che chei che ur covenete a puedin aurî a dut il patrimoni che fin cumò al è stât produsût tes scuellis, e ançe di chel dal nestri concurs».

**Pe prossime edizion, sarano des novitâts?**

«Sì, o 'ndi varin. Alc al bol te pignate, ma cumò no podin ancjemò distaponâle».

**ERIKA ADAMI**

## GNOVE RUBRICHE DI BEPI AGOSTINIS

# Art in Friûl ogni setemane su la Vite Catoliche

**D**AL PROSSIM NUMAR, «la Vite Catoliche» e tararà a publicâ une rubriche dedicade ae art in Friûl – sco-mençant de preistorie e rivant fin ae metât dal Nûfcent –, par cure di Bepi Agostinis, za colaboradôr de «Pagine furlane» dal setemanâl, li che fin al numar stât al à curât une rubriche su la Cjargne cu lis bielîs fotos di Gino Del Fabbro.

Cemût isal nassût chest interès pe art furlane? «La mè passion pe lenghe furlane mi à puartât ae fin dai agns Setante a slargjâ il gno interès tes trasmissions che o fasevi intune radio private, dulâ che ogni setemane o presentavi i poetis furlans e lis lôr poesii. Viodût che la trasmissions e veve une buine scolte, mi vein proponût di fâ alc altri – al ricuarde Agostinis –. La art, in gjeneral, mi à simpri interessât, cussì o ai pensât di fâ une rubriche setemanâl su la storie de art furlane. Mi soi metût a cirî, ma une vere storie par furlan no esisteva, dome doi librets «Ristret de storie de art» di Pieri Piçul, un centenâr di pagjinis, al jere ben pôc, alore o ai començât a cirî e comprâ libris, partint de preistorie par rivâ ai prins dal Nûfcent. O soi lât indenant par plui di doi agns. Le vevi butade jù su dai cuaders a man, tant o vevi dome di leile».



I paviments in mosaic de basiliche di Aquilee.



Autoritratt di Afro Basaldella.

Dut chel materiâl cumò al vignarà publicât su «la Vite Catoliche», ogni setemane, te rubriche «Storie de art furlane in lenghe», ma comedât, al spiegher Agostinis. Intant «lu ai tornât a scrivi te grafie uficiâl. Po, fevelant par câs di cheste mè idee cun bons. Zuan Carli Menis, za diretôr dal Museu diocesano e Galariis dal Tiepolo di Udin, mi à domandât di dâi une voglade. Lu à let dut, dantmi sugjeriments. Entusiast, mi à dit che al sarès di fâ un libri, par vie che par furlan no esist ancjemò une storie de art complete. Daspò o ai presentât il lavôr al professôr Be-

pi Bergamin, e ançe lui mi à dât buinis dretis, cussì mi soi butât a plen sul lavôr, tornant a passâlu daûr dai conseis ricevûts e slargjant la part dal Nûfcent fevelant di altris artiscj che tai libris de art furlane, ma scrite par talian, no jerin ancjemò stâts tratâts. Lavorant sul Nûfcent, o ai scuviert diviers artiscj che no son tant cognossûts, che, però, a àn dât una man ae nestre art e che di sigûr, des pagjinis da «la Vite Catoliche», a saran una scuvierte ançe par tancj altris, magari no savint che tal lôr país a son artiscj preseâts».

**E.A.**